

# 't Herenhoentien



## BESTE KIENDER!

Et duurt mar evenpies meer en dan kommen Sunderklaos en zien Zwatte Pieten weer naor oons laand toe. Jim hebben daor vast een hieleboel zin an, krek as wi'j. Wie d'r ok een protte nocht an hebben, bin de dieren in de bos van Piepmoes. Want, as et even kan, komt Sunt daor ok. En as hi'j niet al te vule tied het, dan gaot iene van de Zwatte Pieten daor naor toe. Dat is ok van 't jaor et geval. Mar dit keer is et een Zwatte Piet die nog niet zo vaeke mit Sunderklaos naor oons toe west het. En hi'j is nog nooit eerder in Piepmoes zien bos west. Wat him allegere overkomt staot in et verhael *Piepmoes en Zwatte Piet*, dat op de volgende bladziede begint. Laot et je mar gauw een keertien veurlezen! Ok et inlegvel het mit Sunderklaos te maeken. An beide kaanten van dat vel staot een Sunderklaoslietien. In et Stellingwarfs, vanzels. Et iene lietien, *Vuuf december*, is bedocht deur de schriever Jouk. Jim kennen him misschien wel van et *Kienderboek van Jouk*. Bi'j dat lietien staon ok de noten, juf of meester kan dan percies zien hoe as et gaot. Et aandere lietien hiet *Heur de wiend goest deur de bomen*. De wieze van dat lietien kennen jim allegere wel, want et is die van *Zie de maan schijnt door de bomen*. Henk Bloemhoff maekte d'r een Stellingwarver tekst bi'j. Perbeer mar es, Sunderklaos vint een Stellingwarfs lietien vast hatstikke mooi.

As Sunderklaos weer weeromme veert naor Spanje, gaon een boel meensken al op zuuk naor een mooie kastboom. Dat gelt ok veur Piepmoes en zien kammeraoden. Op de achterkaante van dit kraantien zien jim Piepmoes die tegere mit zien nefien en twie van zien voegelvrienden, et roodbossien en de gelegouw, de kastboom an et optugen is. Mar wat vreemd, zullen jim daenken. De tekening staot d'r twie keer op. Klopt! Allie d'r bin acht verschillen tussen beide tekenings. Kun jim die achte vienen?

En as ok et kastfeest achter de rogge is, bin we toe an ooldjaor. Dan zit et jaor d'r op en kun we an een spik-splinterni'j beginnen. Meugen jim et ooldejaor aenlik al uutzitten of moej'm, krek as de aovend aorig begint te wodden, op bedde?? Hoe dan ok, wi'j weensken jim een hiele fijne decembermaond toe en hopen dat jim van alle lekkere Sunderklaosnuupgoed, kastmaoltieden en euliebollen niet al te misselik wodden... Veul plezier en tot in et ni'je jaor!

*'t Herenhoentien is veural bedoeld veur groep 1, 2, 3 en 4 van et basisonderwies in de Stellingwarven en verschient vier keer in et jaor. Et wodt bedocht, saemensteld en klaormaekt deur Sietske Bloemhoff en Gery Scholten, in opdracht van de Intergemientelike Begeleidingsgroep Hiemkunde in Oost- en West-Stellingwarf.*

## PIEPMOES EN ZWATTE PIET

*(Een veurleesverhael van Sietske Bloemhoff)*

Et is de eerste december. Nog een peer daegen en dan is Sunderklaos jaorig. Een peer weken leden is hi'j in Nederland ankommen. Piepmoes en zien kammeraoden hebben dat allegere zien op de tillevisie. Et was best spannend west onderwegens, vertelde Sunderklaos. Et weer was hielendal niet zo mooi en et hadde omme-raek wi'jd. De boot had aorig schommeld en verscheiden Pieten weren zeeziek west.

Ok vandaege is et weer niet mooi. Et regent en et wi'jd hadde. Et is echt weer veur een goeie regenjasse en leerzens. Die het Piepmoes dan ok an as hi'j besluit om nog even naor zien kammeraad de doeve te lopen. De moes het zowat de hiele dag in huus zeten en wil d'r now nog even uut. Et wodt al een betien duuster as hi'j et pattien uutstapt. A'k aanst weer op huus an gao, mag de zaklanteern wel an, bedaenkt de moes. Mar goed da'k die in de buse stopt heb.

As hi'j bi'j de doeve anbeland is, het die de laampe al an. Et is d'r hiel gezellig, want et roodbossien en de gelegouw bin d'r toevallig ok. Ze bin mit 'n drienend Sunderklaoslieties an et oefenen, want as Sunderklaos aanst komt, moe'n ze die wel goed kennen. Et klinkt hatstikke mooi, veural et 'dudeljohow' van de gelegouw. Wat kan die voegel toch mooi zingen. Piepmoes dot now ok mit. Eerst heur ie him hiel zachies piepen, mar nao een posien zingt de moes uut volle bost. Tjongejonge, Sunderklaos zal wel opkieken dat die dieren zo prachtig zingen kunnen! Even laeter drinken de kammeraoden nog een beker waarme sukelaomelk en dan gaon ze weer op huus an. Et is al niet zo vroeg meer en et weer is haost nog beroerder as doe ze kwammen. Et eerste aentien lopt Piepmoes tegere mit et roodbossien en de gelegouw op. Mar dan moe'n die een ere kaante uut en gaot hi'j aliend verder. De moes dot de zaklanteern an, zo duuster is et onderhaand. Et wi'jt en regent nog de hieltied. Now en dan zwiepen de toeken de moes in et gezicht.

Bah, daenkt Piepmoes, ik bin bliede a'k aanst weer lekker in mien kesteel bin. Sunderklaos en zien Pieten treffen et ok niet mit dit weer.

As de moes bi'j et middelpad is blift hi'j inienend staon. Heurt hi'j daor wat? Piepmoes stikt zien koppien wat hoger de locht in en luustert nog es beter. Ja heur, et is krek as heurt hi'j even verderop iene praoten. Luusteren jim ok mar es...

'Ikke niet vienen kan... Ikke pad hier ok niet weten... Hu, wat een weer... En op die boot ikke al zo ziek as een katte... En now nog weer naor zoe'n katte... Twie katten... Snetkatten... Snetweer... Was ikke mar in waarme, zunnige Spanje weer...'

Oe heden, daenkt Piepmoes. Dat is iene van Sunt zien Zwatte Pieten! En hi'j is verdwaeld, hi'j kan et pad niet vienen. Da's ok wat, ik zal gauw naor him toe om him te helpen.

Aarme Zwatte Piet. Eerst zeeziek op de boot en now ok nog verdwaeld in de bos van Piepmoes. En snetweer. En snetkatten. Mar hoezo, snetkatten?? Bedoeld Piet Klaos de Kaeter en Miep?

Intied het Piepmoes Zwatte Piet haost vunnen. Hi'j ropt:

'Zwatte Piet, Zwatte Piet, bin ie daore?'

Piepmoes schient mit zien zaklanteern in de ronte en zicht dan inienend Zwatte Piet. Piet zicht d'r aorig ver-fomfaaid uut. Zien mooie kleren zitten onder de modder en de prachtige vere op zien musse hangt hielendal slop naor beneden. Piet is kletsnat en zien zak mit peperneuten ok.

'Waacht even, Zwatte Piet,' ropt Piepmoes, 'ik bin Piepmoes en ik kom naor je toe. Wat is d'r mit jow?'

'Piepmoes?', antwoordt Zwatte Piet, 'ieje Piepmoes? Ieje wonen in mooie kesteel? Ikke daore west, heb peperneuten strujd. Now ikke naor katten moet. Maos en Kliep, of hoe ze ok weer hieten? Even op briefien kieken. Ach nee, Klaos en Miep ikke naor toe moet. Mar ikke huus van katten niet vienen kan. Ieje weten, Piepmoes?' raffelt Sunderklaos zien knechien in ienkeer deur.

'Mar al te best, Zwatte Piet,' zegt Piepmoes. 'Ik weet mar al te best waor die katten wonen. En moet ie daor naor toe? Now, ik hoop mit een zakkien zoolt. Of liever nog, mit twie zakkies zoolt.'

'Hoe datte dan, Moespiep, ach nee, Piepmoes,' vragt Piet. 'Waoromme zakkies zoolt? Katten niet lief west binnen? Ikke katten mitnemen naor Spanje? Ach nee, ikke niet stoute katten in Spanje hebben wil. Mar watte dan doen, ikke Sunderklaos vraogen zal.'

'Dat moej' doen, Zwatte Piet,' zegt Piepmoes en vertelt him over de streken van de katten. 'Mar ie holen toch ok wel van grappies, now?' gaot hi'j verder. 'Alle Zwatte Pieten holen daor toch van? Zuwwte tegere wat bedaenken en een grap uuthaelen mit de katten? Mar gao eerst mar even mit naor mien kesteel, dan kuj' even

opdreugen en je wat opknappen. Intied bedanken we wel wat.'

'Best, Moespiep, Piepmoes, bedoel ik,' vint Zwatte Piet. 'Wi'j wat moois bedanken. Ikke gek op grappies.'

As ze nao een posien weer tot et kesteel uut kommen, hebben Piepmoes en Zwatte Piet de grootste wille. Zwatte Piet zicht d'r netties uut. Zien kleren bin dreuge en de vere staot weer parmantig omhogens. Hi'j het een briefien in de haand. Gelokkig is et een stok dreuger en de maone schient mooi deur de bomen. Ze lopen naor de boerderi'je van de katten toe. Wel veurzichtig vanzels, ie weten mar nooit as die beide doe-rakken niet buten binnen. Zwatte Piet en Piepmoes gaon zachies naor een raem en kieken veurzichtig naor binnen. Ja heur, daor hej' de beide katten. Ze liggen tegere in een maantien bi'j de verwaarming te soezen. Dan tikt Zwatte Piet op et raem. En nog een keer. De katten wo'n wakker en knipperen mit de ogen. Ze kieken om heur henne, mar zien niks. Dan klopt Piet nog es op et raem, voolt et briefien eupen en lest mit een zwaore stemme veur:

'Wonen hier in deze grote boerderij de beide katten Klaas de Kater en Miep? En klopt het dat deze beide katten wel eens heel erg vervelend en ondeugend zijn?'

'Oe hedenhitskes, Klaas,' mierkt Miep, 'Wat een zwaore stemme, wie is dat in de hemelsnaeme?'

'Ik weet et niet,' mauwkt Klaas, 'kiek ie mar es even.'

'Geef eens antwoord,' buldert Piet verder.

'Ik d-durf niet te k-kieken, Klaas,' bibbert Miep. 'W-wie wet, m-misschien is et Sunderklaas w-wel, en z-zo lief b-bin we niet w-west. K-kiek ie zels mar es.'

Miep duukt van poere angst onder zien klietien in de maand. Klaas kikt verheerd om him toe. Allemachtig, de witte katte kon wel es geliek hebben, misschien is et Sunderklaas wel. En as Sunderklaas wet wat zi'j dit jaor allegere uutspeekt hebben, now, dan liekt et niet best.

'Antwoord! Nu!', brult Piet nog een keer.

'Jaja, Sunderklaas,' snokt Klaas et haost uut. 'Ie hebben geliek, wi'j wonen hier en soms bin wi'j wel es een betien ondeugend. Een inkeld keertien plaogen we Piepmoes wel es evenpies. Mar nooit zo slim, heur, Sunderklaas.'

'Een inkeld keertien,' bouwt Zwatte Piet Klaas nao. 'Een inkeld keertien. Jullie plagen die aardige muis veel en veel te vaak. Ik ben daar echt ontzettend boos over. Ik wil niet dat dit ooit nog eens weer gebeurt. Is dat duidelijk?'

'J-ja, Sunderklaas, tuurlik Sunderklaas,' jammert Klaas.

'Z-zeker Sunderklaas, jow hebben groot geliek, Sunderklaas' piept Miep onder et klietien weg.

'Zwarte Piet is hier ook,' gaot Piet nog even mit zien bulderstemme deur. 'Hij heeft z'n nieuwste roe bij zich. Daarmee kan hij geweldig hard op jullie achterste slaan. Willen jullie dat eens voelen?'

'Liever niet, Sunderklaas,' janken de katten now tegere. 'Piepmoes zal van oons nooit gien last weer hebben. Wi'j vienen et zo arg wat wi'j daon hebben, et spiet oons toch zo, Sunderklaas.'

Klaas en Miep zitten now stief tegen mekeer an onder et klietien te kieken, zo bange bin ze.

Piepmoes en Zwatte Piet valen zowat tegen mekeer an van et lachen. Wat een onneuzele katten bin et toch. Zo zol Sunderklaas et ommes in warkelikhied nooit anpakken. Hi'j zol gewoon anbellen en naor binnen toe gaon en dan es mit de beide katten praoten.

Piepmoes en Zwatte Piet besluten dat et zo wel genoeg west het en gaon weer weeromme. Piepmoes naor zien kesteel en Zwatte Piet naor Sunderklaas. Mar Zwatte Piet kan et niet laoten en tik nog ien keertien mit de roe op et raem.

'Jullie zijn gewaarschuwd, hoor!' kan hi'j niet naolaoten nog een keer brommen.

As Zwatte Piet et verhael laeter an Sunderklaas vertelt, kikt die toch wel een betien bedankelik.

'Aenlik kan et niet hielendal deur de beugel, Piet,' vint Sunderklaas. 'Jim hadden aenlik niet krek doen mocht as bin ie mi'j. Ik kan et mi'j wel een betien veurstellen, dat wel. Mar doe et mar niet weer, ofpraot?'

Dat belooft Zwatte Piet, mar dat hi'j now echt spiet het....

De volgende dag bezuukt Sunderklaas de dieren in de bos van Piepmoes. Hi'j het veur elk wat lekkers mit-neumen. Piepmoes krigt van him twee katten van massepein. Sunderklaas schuddekopt es as hi'j die an et moesien geeft, mar knipoogt ok. Piepmoes krigt d'r zuver een kleur van en dot bi'j et zingen van de lieties, tegere mit zien voegelvrienden, nog meer zien best as eers...

# ZUUK DE ACHT VERSCHILLEN



Z U U K D E A C H T V E R S C H I L L E N



© 1985 Hummelwerk Oren UJ - Steylbergweg

© 1985 Hummelwerk Oren UJ - Steylbergweg



## VUUF DECEMBER

Vuuf december! 't Peertien staot  
 Op et dak te springen.  
 Piet, die naor de schostien gaot,  
 Heurt de kiender zingen.  
 Sunderklaos die luustert ok  
 Naor de kleine stemmen.  
 En hi'j glimlacht van gelok!  
 -Wat moe'n die now hebben?  
 Prenteboeken, deusies kleur,  
 Waegens mit een peerd d'r veur?

'Sunderklaos, och goeie man,  
 Zuj' oons niet vergeten?  
 Breng oons toch wat, as et kan.  
 Taoi, om op te eten;  
 En veur Jan een deusien kleur;  
 En veur Piet een waegen;  
 En veur Annie kralen, heur!  
 Klaas wil zo graeg zaegen!  
 Huj veur 't peertien ligt al klaor!  
 Kiek mar, in die klompe daor!'

Sunderklaos het alles heurd,  
 En hi'j lacht tevreden.  
 Piet zorgt, dat et gauw gebeurt!  
 Die klimt naor beneden.  
 Kleurties, kralen legt hi'j daor,  
 O zo still' en vlogge,  
 Netties veur de kiender klaor.  
 En dan rap terogge!  
 't Peertien snoft et huj: Hap-hap!  
 Veerder gaot et! Trippel-trap!

*Jouk*

Vuuf de - cem - ber 't Peertien staot  
 Op et dak te spring - en  
 Piet, die naor de schostien gaot  
 Heurt de kiender ring - en  
 Sun - der - klaos die luus - tert ok  
 Naor de klei - ne stem - men  
 En hi'j glim - lacht van ge - lok!  
 - Wat moe'n die now heb - ben?  
 Breng - te - boe - ken, deusies kleur.  
 Waegens, mit een peerd d'r veur?

## HEUR DE WIEND GOEST DEUR DE BOMEN

*Op de meziek van Zie de maan schijnt door de bomen*

*Stellingwarver tekst: Henk Bloemhoff*

Heur de wiend goest deur de bomen,  
meensken, 't wodt een koolde naacht.  
Sunderklaos moet now haost kommen,  
'k had him lange al verwaacht.

't Is te glad, donkt mi'j en 't sni'jt zo,  
aarme hoppe, aarm dier.  
'k Hebbe wottels veur jow klaar legd,  
Zwatte Piet die vint ze hier!

'k Was vanzels wel es ondeugend,  
Sunderklaosien, goeie man!  
Mar ik zal et echt nooit weer doen,  
Sunderklaos, daor kuj' op an.

Hee... wat is dat butendeure,  
schosselt iene deur de sni'j?  
Dat moet Sunderklaos wel wezen,  
komt hi'j toch veur jow en mi'j?

Morgenvroeg dan za'k wat vienen!  
Peperneuten, marsepein,  
en een bouwdeuz' of een poppe,  
'n boot, een balle of een trein!

*Refrein:*

...Mar ik weet da'k slaopen moet,  
dat ik kroep gauw onder 't goed.  
(2 keer)

